

**Balua na bhisi
gba Polo pi omabhuka na gũdhũ
na
Kolito
Eli na kalanũ**

Balua na bhisi inde li Polo aye nani e pi okpála na Kolito, ani aye bhú nedhinga inde u dũ adje lio lie ne omabhuka na Dadjua na gũdhũ na Kolito de-o. Omabhuka koko na Dadjua gba Ebhe adũ nani nagũ Polo naali. Engú bini, ani asuno 'ndjá bua gba e ngú nadge lie ne uo, ani atsia adje djali naali li nedhinga li engú bhomũ-o andjia lie sũnda uo-o.

Engú na bini bhú balua inde-e, Polo ngakpo 'ngú pindji nadge lio ne okpála na Dadjua na Kolito, ani akpo ta ani agie 'ngú lie kpekpeke li sobho inde adũ bhú Dadjua gba Ebhe-o, ne nagũ inde li okpála na Kolito adũ agũ Dadjua gba Ebhe-e ne e-o. Polo atsia asuno di djali gba e, padhá de, anga egú inde ani agũ e, amene me okpála dji di bua o amba u tsia dje di lio. Pipita-a, ani atsia ayo ka okpála na Dadjua gba Ebhe-e me u ha makiso ne bádha bua, ngũbula nateteke omabhuka inde bhú ndibhili bhú Dadjua na Yudaya ne di. Bhú oalo na soso-o, Polo ngakpokpo 'ngú pindji kulu gba e na bhũlũ titima pi okpála koko na Kolito inde ngau lio me ni ne obhũlũ titima na kũkũlũ gba Yesu ngaani. Padhá de, anga okpála ango-o adũ apa me Polo ne bhũlũ titima na eu.

Ongbengbe onǵú inde bhú bhuku inde-e ngae inde:

Eli na kalanu 1:1-11

Polo a la di-e Dadjua gba Ebhe na Kolito 1:12 – 7:16

Makiso pi omabhuka na Yudaya 8:1 – 9:15

Nakpokpo 'ngú gba Polo ne angu maka bhulu titima gba Yesu 10:1 – 13:10

Eli na soso 13:11-13

Polo yi omabhuka na gudhu na Kolito mayi

¹ Ma aye balua inde-e ngama Polo bhú dabili bini ne ndai ní Timoté. Ma aye pi yi omabhuka na Dadjua gba Ebhe inde bhú gudhu na Kolito di ne pi yi obhende bhú ndu doto na Akai-e libhomu. Ebhe amene ngae me ma du ne bhulu titima gba Yesu Kilisito . ² A ayo me Ebhe 'Dyi ní ne Ngámá Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

Omabhuka na Kolito ngazu likabhu bhú dabili bini ne Polo

³ A ayo me u toko Ebhe. A ko 'dyi Ngámá gba ní Yesu Kilisito. A ko 'dyi ní inde abedhe ne ndjinga bedhe. A ko Ebhe inde ngateteke bua kpála bhú ndu 'ngú hana. ⁴ Ani ngateteke bua ní bhú ndu olikabhu gba ní-e hana, ngubula me ní teteke bua okpála bhende ngazu likabhu-o, li kpadji na angu inde, nganí makpe, ní asia e ka ani-o. ⁵ Maka ya nde lie ngazu likabhu ne Kilisito na paká paká-a, ani bhadi ngateteke bua ya na paká paká. ⁶ I du me ya nde bhú likabhu-o, a ko ngubula me yi sia

angu di ne mukobho. I du me bua ya nde ake-o, a ko ngubula me yi sia di angu. Angu ango-o ngaha pi yi nakibila ngua olikabhu inde ya nde ngakibila e-o. ⁷ Ya nga'o to ya me Ebhe ateteke yi mateteke. Padhá de, anga ya ambila ndjindji me yi ngazu likabhu bhú dabili bini ne ya. Li Ebhe aké bua ya lie-e, bua yi aké bhadi moko.

⁸ Ondaise ya, ya akunda me yi mbila ngua likabhu inde ya azu e bhú ndu doto na Adjia* ndjindji. Ya azu likabhu naali, likabhu ango-o aha angu ya maha. Ya du abhundja de me ya akoto bhúbhú makoto de. ⁹ Ya adu abhundja li bua ya me ekpi gba ya-a ale. La-a, engú bhomu-o akolo li ya ngubula me ya a'ó nabhuka gba ya-a bhú ya makpe de, ya 'o bha bini bhú Ebhe kpi e kpi. Ani ngazuku okpála inde amu-o ngae. ¹⁰ Ani agbegbe ya bhú nakpi bhomu-o ngae. Ani agbégbé matá ya bhú okoko magbegbe. Ya la di nga'o 'to ya me ani agbégbé galikpe ya bhúbhú magbegbe. ¹¹ Ebhe améne bhobhomu-o, i du me yi nde akpetse liyi ne ya bhú dabili bini bhú mayo-o. Abhomu-o, nedhinga li Ebhe adjé mayo gba yi-e lie, ani tsia há bádha bhú 'bu gba e pí ní padhá, li okpála bhelé tsia gie di heni pi ani.

Polo apa me ni nú nga bhú Kolito mbia inde-e de

¹² Ehe inde ya nde ka e bhú djali ngae inde: bua ya ngaziba me ya adhuku bhú ká okpála ne nake liya ne kuto bhú dabili bini ne nawo 'ngú

* **1:8** 1:8 Adjia: A ko ndu doto adu nani bhú kuti na Tiliki na naki-o. Efeso du nani ne 'ngbé gudhu na kuti ango-o ngae.

de. Ebhe akunda me ya dhuku bhú ká yi moko. Ya dhuku bhú ka yi ne imbilangú inde i yie ka okpála de. Engú bini, ya ngadhuku ne bádha bhú 'bu li Ebhe ngaha e pi ya ngae. ¹³⁻¹⁴ A ayo me yi mbila engú bhomu, anga bhú obalua ya aye e pi yi-e, ya aye bha engú inde yi ti da natanga e, yi ti di da nako mboli e ndjindji. Nakolo pi mbia inde-e, yi dje nga ya má kpulukutu de! Engú bini, ma abhundja me yi ahólo nadje ya má kpulukutu madje! Abhomu-o, li 'kpí li Ngámá Yesu agó lie, yi akpí djali li 'ngú gba ya maka ya nde di lie ngakpi djali li 'ngú gba yi-o.

¹⁵ Ma adu nako ne nabhuka bhú 'ngú bhomu-o. Kaka-a, ma adu akunda me ma apu agba yi bhutsibhutsi bhisi, amba yi sia di bádha bhú 'bu bhutsibhutsi na bhisi. ¹⁶ A akunda napa me ma akunda nako nanu agba yi kala nanu bhú Makedonia.† Pipita-a, ma adu di akunda me ma gie matá lima agba yi ngubula me yi teteke ma ngubula nanu bhú Yudaya.

¹⁷ Nedhinga ma apa lie pi yi me ma améne mo-o, ma apa ne 'li ma bhisi bhisi? A mo-o ade. Nedhinga ma nga'o oekpa gba ma-a lie, ma'o li mabhundja inde ayie ka ma makpe de, ngú napa me ma aziba engú ne nayayala bhú dabili bini. ¹⁸ Ebhe apá li ma ngae me engú ma apa e pi yi inde-e, ma pa ne eli bhisi bhisi de. ¹⁹ Padhá de, anga Yesu Kilisito, Ndili gba Ebhe inde ya akpokpo engú gba e pi yi-e, ngama Polo, ne Sila bhú dabili bini ne Timoté, ani go nani ngú naziba

† **1:16** 1:16 Makedonia: A ko ndu doto bhú kuti gba oGiliki. A li pápá na Abebe.

'ngú ne nayayala bhú dabili bini de. Engú bini, ani memene engú inde ani ngapa e-o.

²⁰ Ndu 'ngú li Ebhe apa me ni améne e pi ní-e, améne lie kabula Yesu. Kaka-a, ya ngaziba me adu moko ne 'li ani ngú nadhөгө Ebhe. ²¹ Ebhe abhu ya ngae makpe, la di-e, ngaani makpe ngato angu bhú ya bhú dabili bini ne yi li kpadji gba Yesu Kilisito-o. ²² Ani a'o di Bu Bhobua gba e li bua ní ngú nasuno me ní ne naani okpála. Maka ani aha Bu Bhobua gba e lie pi ní-e, ní ambila bhadi me ani ahá di ndu ohe koko inde ani apana e pi ní-e maha.

²³ Ne 'li Ebhe, li ma pa eu-o, Ebhe de bhelo ma. Kabula nalila‡ yi-e, ma kunda nanu agba yi bhú Kolito mbia inde-e de. ²⁴ A ko de me ya ngakunda nau ngamá pí nabhuka gba yi-e de ngú napa me yi bhuka bha bini bhende ya ngakunda e de. Padhá de, anga yi alu kpekpeke bhú nabhuka gba yi-o. Ya akunda mangbo namene kulu bhú dabili bini ne yi ngubula me bua yi du bhú djali.

2

¹ Abhomu-o, ngama-a, ma apa li bua ma me a ndjindji ade me ma nu nga agba yi-e de. Padhá de, anga ma asiti matá bua yi ne toto* ² Li ma ha siti pi bua yi-e, a há matá djali muma da?

‡ **1:23** 1:23 Nalila: Polo akunda me ni 'o nedhinga pi okpála na Kolito ngú nadi bua o li 'ngú u amene e li ani-o. * **2:1** 2:1 Ne toto: Polo anu nani bhú gudhu na Kolito, suka mabhuka bini na Dadjua gba Ebhe-e atsia asobho ani, engú bini Dadjua gba Ebhe-e tsia gama 'ngú tété de.

Padhá de, anga kpála inde li bua e asiti-e, tí matá da naha djali muma de. ³ Kaka-a, ma aye balua bhomu-o pi yi, maka ma aye nako lie bhú balua gba ma na kalanu-o.† Ma kunda nako de me ma kolo agba yi-e, bua ma de siti matá ka okpála inde ayo nako me u ha djali muma-a de. Ma ambila na paká me nedhinga ma nde lie bhú djali-e, ndu yi hana di bhú djali. ⁴ Nedhinga ma aye balua bhomu-o lie pi yi-e, bua ma adu me a nde abedhe ne likabhu di ne tsulu bedhe. Ma aku belegu egbá. Yi abhundja de me ma aye balua bhomu-o pi yi ngú na siti bua yi-e de. Ma aye mangbo ngú nasuno pi yi lele mukunda ma nde pi yi ne e ko.

Polo apa me u mbu li kpála inde amene siti 'ngú-o

⁵ Li 'ngú bhende atsia kpála inde amene siti 'ngú-o, ani asiti bua ndu yi hana ane ma mane. Engú bini, ma kunda napa 'ngú tété ne na'e'e bhú da e ma'e de. Ani siti bua ndu yi hana de, la-a, ani asiti bua té okpála bedi bhú ká yi. ⁶ Okpála bhelé bhú ká yi ambe bhú 'ndji kpála bhomu-o ambe. Ma abhundja me a pise moko. ⁷ A ayo ibili mangbo mbia inde-e me yi suno bádha bhú 'bu pi ani, amba yi to masi bhú ani, ngubula me likabhu ahá angu ani má tsitsidha de! ⁸ Kaka-a, ma ayo ka yi me yi suno mukunda gba yi-e pi ani. ⁹ Ta naye balua gba ma na kalanu-o pi yi-e, a ko ngubula nale yi, amba ma mbila me yi nani

† 2:3 2:3 Balua na kalanu: A ko bha ndju balua na bini gba Polo pi omabhuka na Kolito de. A ko balua inde angita pi ní-o.

bedhe ngú namene ndu 'ngú inde ma apa e pi yi-e hana. ¹⁰ Yi suno bádha bhú 'bu pi kpála-a, ma asúno bhadi bádha bhú 'bu pi ani. Li ma mbu li siti 'ngú-o, i du me engú na sisiti ngú nambu tété ka ma nde uu-o, ma ambú tété ka yi kala Yesu Kilisito . ¹¹ Ma amene mo-o ngubula me Satana apíte ní li 'ngú bini de. Padhá de, anga ní mbila engú inde ani akunda namene e ndjindji.

Polo adu akunda me Tito go bhaka ni bhú gudhu na Tuluasi ne ngali gba omabhuka na Kolito

¹² Nedhinga ma akolo lie bhú gudhu na Tuluasi ngú nakpokpo Bádha Ngali gba Yesu Kilisito-o, ma au me Ngámá abhulu 'bhe bhoti muma ngú nakpokpokpo abhulu. ¹³ Engú bini, ma azu likabhu li bua ma naali anga ma bhaka ndai ma Tito de. Kaka-a, ma abhana lima pi okpála na Tuluasi, ma atsia atapa bhú ndu doto na Makedonia.

Polo ngadhögö Ebhe kabula kulu gba e-o

¹⁴ Engú bini, a ayo me ya dhögö Ebhe, anga ani ngakö pi ya ndu 'kpí hana kalanu bhú galasisi† inde ngasuno me Yesu Kilisito agboko 'gú pí 'ndji ndu 'he hana agboko. Ani ngatima ya ne ndu bili hana ngubula nasuno Yesu Kilisito pi okpála. Nambila ani-e, a maka bádha se 'he inde ngapu ne ndu bili hana. ¹⁵ A ko paká. Ya maka mungotsi inde li se e nde babadha, inde li

† **2:14** 2:14 Bhú galasisi: Polo ngabhundja pindji 'ngbé ngámá gba osudha inde ngagie lie bhú 'gú me ani agboko 'gú-o agboko. Okpála ngabhia kuo li ani ne natsulu mungotsi.

Yesu Kilisito aha e pi Ebhe. Se mungotsi angoo ngapu pi okpála inde li Ebhe ngakobho o di ne okpála bhende ngangita. ¹⁶ Pi okpála bhende bhú ngita-a, se mungotsi bhomu-o sisiti, pi uo-o, se mungotsi angoo ngatima uo bhú kuo.Š Pi okpála bhende li Ebhe ngakobho o-o, se mungotsi bhomu-o babadha, a ngaha pi uo mukobho. A moko! A li nakpokpo Bádha Ngali-e ne tata na ngbéngbé. A ti da namemene da? ¹⁷ Ya maka okpála koko bhelé inde ngakpokpo eli gba Ebhe-e li nasia tia ade. Engú bini, ya mangbo ngakpokpo 'li Ebhe kala ani bhú ngbili 'ngú , bhú nakpetse lio ne Yesu Kilisito.

3

Omabhuka ne balua inde li Yesu Kilisito aye e-o

¹ Engú inde ma aye e bhomu-o akunda napa me ya akunda matá na'o liya ngaya makpe abhúlá? Ya ne gumu balua ngú nasuno pi yi me ya ne obhulu titima gba Yesu ade. Ya di ne gumu ade me yi ye balua pi ya ngú nadhuku ne di me ya du nasusuno pi okpála. La pi obhulu titima koko-o, a ayo balua. Ya maka uo ade! ² Yi ne balua gba ya-a inde li Yesu Kilisito aye e li bua ya-a ngayi makpe. Ndu kpála hana ti da nambimbila ne natatanga. ³ A ko paká, a mbámbá me yi ne balua inde li Yesu Kilisito aye e ngae, ani atsia atima sakpa ya. Ani ye ne 'ngu balua de. Ani aye mangbo ne Bua gba Ebhe inde

Š **2:16** 2:16 Bhú kuo: Bhú galasisi-e, adu nani ne osudha inde agboko 'gú, adu la di ne obhende u agboko o bhú 'gú-o. Obhende u agboko-o, adu nani nadjeke kuo.

uu-o. Aní ye pí opapala teme† de, aní aye mangbo li bua okpála-kuti.†

Polo ngamene kulu gba Ebhe-e li lele gandja na mbia

⁴ Ya ngabhuka bhú onǵú bhomu-o anga Yesu Kilisito apana pí ya me Ebhe atima ya ngae. ⁵ A ko de me ya ngamene ngua kulu bhomu-o ne angu gba ya makpe-e de, ya mene bhú 'ndji ya de. Ebhe ngaha angu bhomu-o pí ya ngú namemene ngae. ⁶ Ebhe aha angu pí ya ngú nadu okpála na kulu na gandja na mbia-a ngae. Gandja ango-o lu pí líli inde u aye nani e maye-e de, alu mangbo pí Bu Bhobua . Líli inde u aye nani e ngato kpála bhú kuo. La-a, Bu Bhobua naae ngaha pí okpála mukobho.

Sangu na gandja na mbia ane bhende na didili-e mane

⁷ Nedhinga li Ebhe aye nani líli lie pí opapala teme ngú nahaha pí Moidje-e , sangu gba Ebhe-e adu asu bhúla aní. Abana li zizi adu andjia lie bhúla Moidje-e, a adu nga bha kpekpeke. Omaɽsalaele ti nani belegu da natsia bhúla aní de.† Ní au me belegu li gandja na didili adu ato kpála lie bhú kuo-o, adu bhadi ne sangu. ⁸ † du mo-o, gandja na mbia inde li Ebhe ngaha Bu Bhobua gba e pí ní bhú e asúno sangu gba Ebhe ane mane. A mo-o adi! ⁹ † du me kulu gba Moidje inde adu nato okpála bhú kuo nde nani ne sangu-o, asi la masi pí kulu na mbia gba Ebhe inde

† 3:3 3:3 Tsia bhú Eki. 24:12. † 3:3 3:3 Tsia bhú Djlm. 31:33.

† 3:7 3:7 Tsia bhú Eki. 34:29.

ngamene me okpála dɔ ngbingbili-e, a asúno sangu gba ani-e ane mane di! ¹⁰ Ní ti belegu da napa me sangu inde akoto nani bhomu-o matá ngau lie ka sangu na naki inde-e ade, anga a ane bhe nani na kalanu-o mane. ¹¹ Padhá de, anga i dɔ me gandja na didili, inde akoto nani ngú nedhinga bedi-e nde akoto ne sangu-o, asi la masi maka gandja na mbia inde ngabhue dɔdɔma ne dɔdɔma-a?

¹² Ya ne nabhuka bhú gandja na mbia-o. Kaka-a, ya ti da napa 'ngú pi yi mbámábá. ¹³ Ya mene maka Moidje de. Padhá de, anga Moidje adu nani nabuku bhúla e ne bongo ngubula me omafalaele aú lele maka zi sangu gba Ebhe inde adu asu bhúla ani-e dɔ abulu lie de-o. Zi sangu ango-o adu la bha nani ngú nedhinga bedi. ¹⁴ Omafalaele ango-o, agbite nani bua o má ki! Ngú nakolo pi naki-e, li ongisi gba uo dɔ natanga ongú inde u aye e bhú gandja na didili-e, u kɔ mbolimboli de. A mana mɔgito me bongo ngabuku tata-a pi uo. Bongo bhomu-o bha bini nga'e lie me kpála nde akpɔtɔ lie ne Yesu Kilisito. ¹⁵ Abana pi naki, ndu nedhinga hana inde li omafalaele ngatanga obhuku gba Moidje lie, u kɔ mbolimboli de.

¹⁶ Engú bini, maka u aye bhú bhuku gba Ebhe-e lie me, li kpála dji bhúla e li pápá gba Ngámá Ebhe-e, oehe inde li pála bongo abuku e ú lie mbámábá. ¹⁷ A ko paká, Ngámá Ebhe-e, a ko Bu Bhobua. La-a, bili li Bua gba Ngámá-a nde li e, okpála inde oo bhú ngu o, a ko matá obalise na líli gba Moidje de. ¹⁸ Ndu ní hana inde li bongo

nabuku bhúla ní-e ayie bhúla o ayie, ní ngasuno sangu gba Ngámá maka bhú bitolobi. Abhomu-o, Ngámá inde di Bu Bhobua-a ngadji ní me ní kolo maka ni, ne sangu inde nganu bha ne kalanu.†

4

Ebhe ngasuno angu gba e bhú bhuku gba obalise gba e-o

¹ Ebhe bhú bádha bhú 'bu gba e aha pi ya kulu nakpokpo Bádha Ngali . Kaka-a, ya gie liya ne sisi de. ² Ya ayala ndu 'ngú na pepe, i du di-e bhe na numu-o hana. Ya mene ehe bhú kali de, ya kpetse di 'li Ebhe bhú dabili bini ne engú na eu de. Ya mangbo ngasuno ngbili 'ngú pi okpála mbámhá. Ya ngamene mo-o kala Ebhe ngubula me okpála hana mbila me lele nadhuku gba ya-a ngbingbili. ³ La-a, i du me Bádha Ngali inde ya ngakpokpo e nde mbámhá ade-e, a mbámhá ade bha bini pi okpála inde ngangita-o. ⁴ U ngabhuka ade anga Satana , ebhe na doto inde-e angbingi imbilangu gba uo-o angbingi. Ngaani ebhe ango-o amene me u aú zi 'kpí inde bhú Bádha Ngali-e de. A ko zi 'kpí na sangu gba Kilisito . Ngaani-e, ani mana Ebhe libhomu. ⁵ Nedhinga ya ngakpokpo Bádha Ngali-e lie, a ko de me ya ngakpokpo engú gba ya makpe-e de. Ya ngakpokpo me Yesu Kilisito ne Ngámá ngae. La pi ya-a, ya bha naaya ne obalise gba yi kabula ani. ⁶ Padhá de, anga Ebhe apa nani me: «Zi 'kpí su bhú biti!†» Ani amene ngae makpe me zi 'kpí

† 3:18 3:13-18 Tsia bhú Eki. 34:29-35. † 4:6 4:6 Tsia bhú Dje. 1:3.

gba ni-e sù li bua ya ngùbula me ya mbila sangu gba ni inde ngasù bhùla Yesu Kilisito-o.

⁷ Oehe na babadha bhomu-o, Ebhe a'o bhù ya. Engù bini, ya bhùbhukù maka madakpa. Ebhe amene mo-o ngù nasuno me angu na ngangamba bhomu-o yie bhù ya de, ayie mangbo bhù ni. ⁸ Ya ngazù ndù ngua likabhu hana, engù bini, likabhu bini ha nga angu ya de. Bua ya angamba, engù bini, ya ngaholo bua ya. ⁹ Okpála ngato mbolo li ya, engù bini, Ebhe 'o ká ya de. U agbo 'i ya, engù bini, u bhèlè ya de. ¹⁰ Ya ngadhukù ne kuo ndù 'kpí hana sa so ya maka Yesu, ngùbula me mukobho gba ani u di lie bhù lele nadhukù gba ní-o. ¹¹ Ndù nedhinga hana ya nde lie bhù mukobho-o, kuo de ya masikpe kabula Yesu. Abhomu-o, u tsia tí da di nau mukobho gba ani-e bhù lele nadhukù gba ní píla doto-o. ¹² Kaka-a, kuo ngamene kulu bhù ya ngùbula me mukobho dù namene kulu bhù yi.

¹³ Bhuku gba Ebhe-e ngapa me: «Ma abhuka mù Ngámá, kaka-a, ma atsia agama 'ngù.†» Ngaya di-e, ya abhuka Ngámá, kaka-a, ya atsia agama di 'ngù. ¹⁴ Ya ambila me Ebhe inde azuku Ngámá Yesu bhù ká okpála inde amu-o, azuku di ya bhù dabili bini ne ani. Ani tsia 'ó di ya bhù dabili bini ne yi de e. ¹⁵ Ndù 'ngù ya ngakibila e hana-a, a ngùbula yi, amba ngayi okpála inde li Ebhe ngasuno bádha bhù 'bu gba e pí yi-e, yi dù nabe ndù yi ane mane. Abhomu-o, mayo gba yi nagie heni pí ani-e tsia bé di ndù e. Bhobhomu-o tsia há sangu pí Ebhe.

† 4:13 4:13 Tsia bhù Ets. 116:10.

¹⁶ Kaka-a, ya gie liya ne sidi de. Abana li kute ya du nandala-a, ya ambila me bua ya ngasia angu na mbia ekpi bini ne bini hana. ¹⁷ Likabhu ya ngazu e mbia inde-e mbomboye, ni tsia sangu na ngbengbe inde ngadjeke ni-o. Sangu ango-o ane ndu 'he hana, a la di ngabhue duduma ne duduma. Olikabhu ni ngazu e inde-e ngaleke ni ngu nasia sangu bhomu-o. ¹⁸ Padha de, anga ni nga'o 'to ni 'to engu i u lie ne djila de-o. Ni 'o 'to ni 'to engu inde ngau lie ne djila de-e de. Ehe bhende ngau lie ne djila ngabhue naali ade, engu bini, ehe i u lie ne djila de-e, ngadu duduma ne duduma.

5

Kute na mbia inde li omabhuka asia e abhula-o

¹ Ni mbila hana me li eti inde ni nde bhú e kpi-e, a ka ni ne eti koko abhula a akunda napa me, ekpi bini, ni akpi makpi, ni tsia 'o ka kute na doto inde. Eti li Ebhe aleke e pi ni-e, okpala yiki ngao de. Eti ango-o adu duduma ne duduma. ² Nedhinga ni nde lie bhú kute inde-e, ni ngalopolo lini anga gumu gba ni na ngbengbe-e me ni dyi kute na abhula maka bongo na mbia. ³ Nedhinga ni a'o ka kute na doto inde-e lie, ni du abhula mandi kute de. Ni asia kute na mbia. ⁴ Ni mbila hana me ni nde nga bha lie bhú kute na doto inde-e, ni ngalopolo lini magito me ni abi tili 'he. A ko de me ni ngagili nadu mandi kute-e de. Ni mangbo ngagili me ni dyi kute na abhula ngubula me mukobho ha angu ehe bhe na kukuo-o. ⁵ Ebhe aleke ni ngubula mukobho

ango-o ngae makpe. Ani atsia aha ngaiza Bua gba e pi ní bhú ka ohe inde ani aleke e pi ní-o.

⁶ Ní mbila hana me, nedhinga ní nde lie bhú kute na doto inde-e, ní nga bha tsutsu de bili li Ebhe Ngámá nde lie-o. Abana inde lie mo-o, ní abedhe ndu 'kpí hana ne masi. ⁷ Padhá de, anga ní ngadhuku li lele nabhuka makpe, ní dhuku li lele nakpata engú ní ngau e ne djila ní-e de. ⁸ A moko, ya abedhe ne masi bedhe. Ya la di ne gumu nayie bhú kute inde-e ngú nanu nadu dengo Ngámá gba ní-o. ⁹ Engú inde li bua ya ngae inde, a ayo me ya mene engú inde anga li Ebhe, abana ya du bhú kute inde, abana ya yie bhú kute ango-o. ¹⁰ Padhá de, anga a ayo me ndu ní hana ní ze bhú djila Yesu Kilisito ngú napa me ani kodho 'ngú gba ní-o. Abhomu-o, li kpála ne kpála tsia sía ehe inde ati ne engú li ani amene e li nedhinga ani adu lie bhú kute na doto-o. Kpála ne kpála asía makalá na bádha 'ngú, i du di-e bhe na siti 'ngú inde ani amene e-o.

Ebhe nga'i okpála bhú 'li ya

¹¹ Ya mbila hana me namanga Ebhe ne ni-ie. Kaka-a, ya ngagili me ya to bhú 'ndji okpála me u bhuka Bádha Ngali ya ngakpokpo e-o. Kala Ebhe-e, ní ti da nawo liní de. Ma ngabhundja la di me kala yi-e, ma wo lima de. ¹² Ya kunda matá de me ya kpokpo 'ngú gba ya-a pi yi ngaya makpe de. Engú bini, ya ngakunda na'o yi me yi du ne gindaginda li 'ngú gba ya-o. Abhomu-o, yi ti da nagie 'ngú pi okpála inde ngau ngbengbe ongú

bhende i ngau lie mbámbá, inde i tsia 'kpí li 'ngú
bhende li bua kpála de-o.

¹³ I dũ me ya nde ne obhũlũ pele maka li
okpála koko ngabhuhundja lie-e, a ko kabula
Ebhe. I dũ me ya nde ne obhũlũ pele ade-e, a ko
ngubula nateteke yi. ¹⁴ Engú inde ngatima ya me
ya mene kulu inde-e ne kekele-e, a ko mukunda li
Yesu Kilisito nde ne e pi ya-o. Ya ambila ndjindji
me Yesu Kilisito akpi mada ndũ okpála hana.
Kaka-a, bhú djila Ebhe-e, ndũ okpála hana amu
bhú dabili bini ne ani. ¹⁵ Ani akpi ngubula ndũ
okpála hana, amba ndũ obhende bhú mukobho
adú matá akobho bhú ngũ o de, engú bini, u dũ
akobho pi kpála inde akpi, atsia azuku pi uo-o.

¹⁶ Kaka-a, ya matá ngatsia kpála ne djila bhe
na kpála-kuti ade. A ko paká ya adũ nako
natsia Yesu Kilisito ne djila bhe na kpála-kuti,
la mbia inde-e, ya matá ngatsia ani mo-o ade.
¹⁷ Nedhinga li kpála akpõtse lie lie ne Yesu
Kilisito-o, ani akolo kpála na mbia. Lele dasundũ
gba ani na kalanũ-o andjia. A ibili bhú ani ne
lele dasundũ na mbia. ¹⁸ Ebhe ngamene ndũ
'ngú bhomũ-o hana ngae. Ani atima Yesu Kilisito
me ani go to guo 'ngú sũnda ní ne o. Ani aha
kulu bhomũ-o pi ya ngae me ya nũ gbele okpála
koko de ni, amba ni to guo 'ngú sũnda ni ne uo.
¹⁹ Padhá de, anga Ebhe adũ namene kulu ngú
nato guo 'ngú sũnda o ne okpála-kuti li kpadji
gba Kilisito. Ani tsia matá siti 'ngú gba uo de.
Abhomũ-o, Yesu Kilisito atsia atima ya me ya
kpokpo pi okpála lele maka a ayo lie me u sia
guo 'ngú sũnda o ne Ebhe-o.

²⁰ Bhobhomu-o akunda napa me Yesu Kilisito atima ya ngae makpe. A na paká me Ebhe nga'i okpála bhú 'li ya. Kaka-a, ya ngayo ka uo ne 'li Yesu Kilisito me, u 'o me Ebhe to guo 'ngú sūnda o ne e. ²¹ Yesu Kilisito mene nani siti 'ngú belegu de bini. Engú bini, Ebhe a'o kili siti 'ngú gba ní-e li 'ngbu ani, ngubula me li kpadji gba ani-e, ní sia ngasa nakolo ngbingbili bhú djila Ebhe.

6

¹ Ya ngamene kulu bhú dabili bini ne Ebhe. Inde lie mo-o, ya ngayo ka yi me, yi aú bádha bhú 'bu li Ebhe apana e pi yi-e padhá de. ² Padhá de, anga Ebhe apa bhú Bhuku gba e me: «Nedhinga akolo lie me ma mene bádha 'ngú pi yi okpála gba ma-a, ma adje yi.

Nedhinga akolo lie me ma kobho yi-e, ma ateteke yi.†»

Ondaise ma, yi gbo 'dje yi, a ko mbia inde-e nedhinga na babadha, a ko nedhinga na makobho.

Likabhu li Polo azu e asuno me a ko kukulu bali gba Ebhe

³ Ya kunda namene engú bini de inde améne me okpála ti ka e-o, anga i du mo-o de-e, u pá 'ngú li kulu gba ya-a sisiti. ⁴ Bhú ndu 'ngú ya ngamene e hana-a, ya akunda mangbo nasuno pi okpála me ya ne obalise na kukulu gba Ebhe. Abana ya du nasia mangua likabhu dho-ie, abana u du nato mbolo li ya, ya bha ngakikibila

† 6:2 6:2 Tsia bhú İsa. 49:8.

makibila. ⁵ U abhi ya, u amba ya bhú tikpɛ, u ato kpéke ndji bhú 'ndji okpála me u mene ya sisiti. Ya abhele kuo ya ne kulu masakpe da napa me ya asia belegu nedhinga nala ne nazu 'he de. ⁶ Bua ya kala Ebhe bubu, ya ngasuno me ya ambila ongu gba Ebhe-e má kpulukutu! Ya ne 'ndjá bua, ya ne bádha bua, Bu Bhobua bhú ya, ya la di ne mukunda na kukulu.

⁷ Ya ngakpokpo kukulu 'ngú pi okpála bhú angu gba Ebhe. Lele bádha nadhuku gba ya-a pi ya maka tia 'gú ngú naha 'gú ne obhulu yala gba ya-o. A di pi ya maka kopí ngú nalila liya ne di sakpa obhulu yala gba ya-o. ⁸ Okpála koko ngamanga ya, okoko ngau ya bhú djila o padhá. Okpála koko ngatoko ya, okoko ngasobho ya. Okpála ngau ya mugito me ya ne obhulu eu, ya nde la ngapa kukulu 'ngú-o. ⁹ Okpála koko ziba de me ya ne obhulu titima gba Yesu-o de, engú bini, okpála bhelé ngaziba ya. Okpála koko ngau ya mugito me ya ne omakpiakolo, ya nde la bhú mukobho-o. U ngato mbolo li ya, engú bini, ya mu de. ¹⁰ Abana li bua ya ngabi likabhu lie ka okpála naali-e, ya bha ndu 'kpí hana bhú djali. Ya bhú ndibhili, engú bini, ya ngamene me okpála bhelé kolo obhulu tia kala Ebhe. Ya ngau liya bhú djila okpála mugito me ehe bini ka ya píla doto inde-e ade. La-a, bhú ngbingbili-e, ndu 'he hana ne naaya 'he.

¹¹ Ngayi ondaise ya na Kolito-o, ya agama 'ngú pi yi mbámá. Ya wo engú inde li bua ya-a belegu de bini. ¹² Pi ya-a, ya gbite bua ya pi yi de, yi agbite mangbo bua yi pi ya ngayi. ¹³ Ma

ngagama 'ngú pi yi mụgito me yi ne ongisi ka ma. Ma ngapa pi yi me: «Yi gie mụkunda ya nde ne e pi yi-e pi ya. Yi awó engú inde li bua yi-e pi ya de.»

Yi akpétse liyi ne omupagano de

¹⁴ Yi akpétse liyi bhú dabili bini ne omupagano ngú namene ehe ne uo de. Ehe inde ngbingbili-e ti da nakpétse lie bhú dabili bini ne ehe na sisiti-e lele pi? Zi 'kpí ti da nakpétse lie bhú dabili bini ne biti lele pi? ¹⁵ Yesu Kilisito ti da nadje lio ne djabulu lele pi? Kpála inde abhuka Yesu-o ti da nadu ne mabhundja bini ne kpála bhende i bhuka de-e uu? ¹⁶ Nganí-e, ní ne 'ngbé 'ti Ebhe inde uu. 'Ngbé 'ti Ebhe ti da nakpétse lie ne 'ti atolo belegu de bini. A maka li Ebhe apa lie li 'ngú gba omaha e me:

«Ma adú bhú ká uo,

ma tsia dhúku bhú dabili bini ne uo.

Ma adú ne Ebhe gba uo, u tsia dú ne omaha ma.†»

¹⁷ Ka 'ngú ango-o, Ebhe Ngámá apa pi uo me:

«Yi ze bhú ká omupagano maze,

yi adú ne uo bhú dabili bini de.

Yi abú 'kpa yi li 'he inde kala ma sisiti-e de,

abhomu-o ngama-a, ma tsia ziba yi.†

¹⁸ Ma adú ne 'dyi yi,

yi tsia dú ne ongisi gba ma.

Ngámá Angbamili apa mo-o.†»

† **6:16** 6:16 Tsia bhú Lev. 26:11-12; ne bhú Edj. 37:27; di ne bhú Djlm. 32:28. † **6:17** 6:17 Tsia bhú Isa. 52:11; di ne bhú Edj. 20:34, 41. † **6:18** 6:18 Tsia bhú 2 Sam. 7:8, 14.

7

¹ Ondaise ma na mukunda, Ebhe apa me engú inde ni apa me ni améne e pi ní-e, ni améne mamene. I nde lie mo-o, a ayo me ní vuru liní bhú ndu osisiti 'ngú inde ngato zibotu li kute ní ne bua ní-e hana. Ní mene ne kpéke me ní du bubu kala Ebhe ne namanga ani mamanga.

Polo akpi ndjili ka li omabhuka na gudhu na Kolito adji bua o lie-o

² Ondaise ma, yi 'o ya li bua yi! Ya amene siti 'ngú li pabili gba kpála bini de. Ya a'e kpála bini li kpadji gba Ebhe-e de. Ya ha 'he ka kpála bini bhú napite ani de. ³ A ko de me ma ngapa 'ngú bhomu-o ngú na'o mangimbo pi yi-e de. A maka ma de apa lie-o, ya ne mukunda pi yi naali. Ehe bini gbó bhusu mukunda ya nde ne e pi yi-e de, abana i du nakpi, abana i du me ní nde bhú mukobho. ⁴ Yi ne kpúkpú na bua ma. Ma ne gindaginda naali li 'ngú gba yi-o. Bhú ndu likabhu ya ngazu e hana, ya gie liya ne sidi de, ya abedhe mangbo ne djali bedhe.

⁵ A ko paká, abana nedhinga ya akolo lie bhú Makedonia, ya sia belegu nedhinga bedi ngú nago de. Ya asia okpekpeke da 'ngú ne ndu pasu hana. Ya du ne guo 'ngú sunda ya ne okpála koko de, ya atsia adu ne tsulu. ⁶ Engú bini, Ebhe inde atoto masi bhú okpála inde andala-a, abedhe matá ya ne masi li nedhinga li Tito agie lie lie-o. ⁷ Ya bedhe bha ne masi ka nago ka ani-e de, engú bini, ngali ani akpokpo e pi ya-a ato di masi bhú ya ngae. Ani akpokpo pi ya lele maka yi ato masi bhú ani lie-o. Ani akpokpo pi ya me

yi abedhe ne gũmu nau ma bedhe. Anĩ apa me yi ngakina liyi ka osisiti 'ngũ yi amene e-o. Anĩ apa me yi ne gũmu nago nateteke ma bhú egú ma ngagũ e ne obhũlu yala gba ma-o. Ma adje lie mo-o, ma abedhe matá ne djali bedhe.

⁸ Ma ambila me balua* inde ma aye nako e pi yi-e aha babuma pi yi naali. Ma ti nako da nadje likabhu li bua ma tété, padhá de anga, ma ambila me balua bhomu-o aha likabhu pi yi ngú nedhinga bedi. Engú bini, bua ma ne likabhu tété mbia inde-e ade.

⁹ A na paká me, ma mangbo ngakpi djali. Ma kpi djali ango-o ka babuma yi asia e ka ma-a de. Engú bini, ma ngakpi djali anga babuma yi asia e amene me yi dji bua yi. Babuma yi asia e bhomu-o, yi asia li lele maka li Ebhe akunda lie-o. Inde lie mo-o, ya mene yi sisiti de. ¹⁰ Padhá de, anga li kpála sia babuma li bua e li lele maka li Ebhe akunda lie-e, babuma ango-o há pi ani nadji bua e. Anĩ dji bua e-e, anĩ tsia kóbho. Ya ti da nadje likabhu li bua ya tété lele pi? Engú bini, li kpála sia babuma li bua e, i dũ me anĩ nde dji bua e de-e, bhobhomu-o ngagbele pi ani nakpi.

¹¹ Babuma yi asia e, yi asia li lele maka li Ebhe akunda lie-o. Yi tsia nga obabadha 'ngú inde li babuma ango-o azu e bhú yi-o: a ngaha pi yi me yi dũ ne bádha bua ngú naleke 'ngú sũnda yi má gala! Yi asuno mbámhá me yi li bhú siti 'ngú de.† Yi ngake 'ngú liyi li siti 'ngú ango-o. Yi ne

* **7:8** 7:8 Balua: A ko balua na bini gba Polo pi omabhuka na Kolito de. A ko balua inde anĩ aye e atsia angita-o. † **7:11** 7:11 Tsia bhú 2 Kol. 2:5-11.

tsulú li 'ngú inde li siti 'ngú ango-o ti da nazu e-o. Yi abedhe ne gumu nau ma di ne namene engú li lele maka li Ebhe akunda lie bedhe. Yi bedhe ngú na'o 'ngú pí kpála inde amene siti 'ngú-o. Yi apana mbámbá me ngayi makpe-e, yi li bhú 'ngú bhomu-o de.

¹² Li ma ye balua pi yi-e, ma ye ka 'ngú gba kpála inde amene siti 'ngú-o de. Ma ye di ka 'ngú gba kpála bhe u amene siti 'ngú li e de. Ma aye mangbo ngú nasuno me yi mbila mbámbá kala Ebhe me yi ne mukunda pi ya li bua yi naali. ¹³ Kaka-a, engú yi amene e akə bua ya kuto.

Bua ya kə bha kuto ngae de, ya akpi di djali naali ka nau me Tito adu ne djali naali ka li ndu yi hana ato masi bhú ani lie-o. ¹⁴ Nedhinga ma atima ani lie agba yi-e, ma akpo 'ngú yi pi ani ndjindji. Mbia inde-e, yi tsia ha numu muma de. Maka ya akpokpo nako lie pi yi kukulu 'ngú ndu 'kpí hana-a, ndu babadha 'ngú ya akpokpo e li 'ngú gba yi pi Tito asuno me a ko kukulu 'ngú. ¹⁵ Nedhinga ani akolo lie agba yi-e, yi asia ani ndjindji. Ndu yi hana, yi amanga ani naali, yi au ani ne tsulu, yi atsia adu amene engú maka ani akunda lie-o. Ani bhundja engú bhomu-o, ani bedhe matá ne mukunda pi yi bedhe. ¹⁶ Ma ne djali, anga yi ne kpúkpú na bua ma bhú ndu 'ngú hana.

8

Polo ato masi bhú omabhuka na gudhu na Kolito me u teteke ondaise o na Yelusalema

¹ Ondaise ya, ya akunda me yi mbila engú inde li Ebhe amene e bhú bádha bhú 'bu gba e

pi okpála na oDadjua gba Ebhe na Makedonia.*
² Omabhuka inde oo azu nani likabhū naali, engú bini, u abedhe ne djali bedhe. U adu nani bhú ndibhili naali, engú bini, u du atsia bhúla 'he pi okpála de. ³ Ma au ne djila ma makpe. U apu 'he nakpata lele ehe inde adu ka uo-o. U apu belegu 'he nane dada mane. U aha bhú ngu o, okpála kata uo tété gandji de. ⁴ U akikiliki lio pi ya naali me ya asuno bádha bhú 'bu pi o, ngubula me o to 'kpa o pi omabhuka na Yudaya ne natima tia pi uo. ⁵ Ehe inde u amene e ane bhende ya adu nabhundja e-o. U aha ngaiza lio libhomu ngubula kulu gba Ngámá Yesu. U atsia aha di lio ngu nateteke ya nakpata lele maka li Ebhe akunda lie-o.

⁶ Kaka-a, ya ayo ka Tito ne kekele me ani gie lie agba yi ngu nandjia dú kulu na bádha bhú 'bu inde ani akpo nani lita e ko. ⁷ Yi ne obhulu tia kala Ebhe nane okpála koko. Nabhuka gba yi-e kpekpeke. Yi ngakpokpo Bádha Ngali gba Ebhe-e ndjindji. Yi mbila 'ngú gba Ebhe-e ndjindji. Yi aha liyi libhomu ngu kulu gba Ebhe-o. Yi ne mukunda naali li pabili gba ya. Ka 'ngú ango-o, yi mene ne kpéke me yi du ne obhulu tia li kpadji na ngua bádha bhú 'bu bhomu-o.

⁸ Engú inde ma apa e pi yi bhomu-o, a ko de me ma aha pi yi maka líli-e de. Ma apa mangbo pi yi, ngubula nasuno lele maka li oDadjua gba Ebhe koko amene lie-o. I du me yi nde akpata lele maka u amene lie-e, yi súno me mukunda

* **8:1** 8:1 ODadjua gba Ebhe na Makedonia: A ko obhende bhú Filipoi, Tesalonike ne Beloya-o.

gba yi-e di kùkùlù. ⁹ Padhá de, anga yi mbila bádha bhú 'bu gba Ngámá gba ní Yesu Kilisito hana. Ngaani kpála inde adu bhulù tia, ani a'o lie bhulù ndibhili ngú nateteke yi. Ani amene mo-o ngú napa me, bhú ndibhili gba ni-e, yi kolo obhulù tia kala Ebhe.

¹⁰ Ma ngaha pi yi mabhundja gba ma pindji napu 'he pi omabhuka inde bhú ndibhili-o. Bhú kalanga inde akodho 'kpi-e, yi adu nako okpála na kalanu ngú napu 'he. Yi du bha bini kalanu bhú napu 'he de, yi adu di ne okpála na kalanu nabhundja 'ngú ang-o. ¹¹ Kaka-a, mbia inde-e, yi ndjia kulu bhomu-o ndjindji. Yi 'o bua yi ngú nanu ne 'ngú ang-o ne kalanu akolo a li soso, ne mukunda inde yi adu nani ne e ngú namemene, nakpata lele ehe inde ka yi-o.

¹² Padhá de, anga i du me yi nde apu 'he pi Ebhe ne bua yi bini-e, Ebhe ngaziziba bha bini li lele bhende ka yi-o. A ko de me Ebhe nga'o 'to e me yi pu pi ni ehe bhende ka yi ade-e de. ¹³ A ko de me ma akunda na'o likabhu gba okpála koko pí 'ngbu yi ngú nato yi bhú ndibhili-e de. A ko mangbo me ndu yi hana yi du ne 'he inde ati ne yi-o. ¹⁴ Mbia inde-e, ehe ka yi bhelé. Kaka-a, yi ti da nateteke okpála bhende bhú ndibhili-o. Ekpí koko-o, yi du di bhú ndibhili me ehe nde ka uo bhelé-e, u ti da nateteke di yi. Li ndu yi hana tsia du ne 'he inde ati ne yi-o. ¹⁵ A maka u aye lie bhú bhuku gba Ebhe-e me:

«Okpála anu ngú nalo mana.

Okpála bhende alo bhelé-e, u azu lie, ale ne uo.

Okpála bhende i lo bhelé de-e, u azu lie, ale bhadi ne uo.†»

Polo atima Tito ne obi e nalo tia

¹⁶ A ayo me ní dhөгө Ebhe inde a'o li bua Tito me ani nu teteke yi maka ya amemene lie-o. ¹⁷ Tito aziba engú inde ya ayo e ka ani-o. Ani ziba bha bini 'li ya de, engú bini, ani aziba ne bua e makpe me ni nu agba yi anga ani ne mukunda pi yi. ¹⁸ Ya atima ani di bhú dabili bini ne ndai ní, inde li oDadjua gba Ebhe-e ngadhөгө e kabula kulu inde ani ngamene e ngubula Bádha Ngali-o. ¹⁹ La matá di-e, oDadjua gba Ebhe abhu ani ngubula me ya anu ne uo bhú dabili bini ngú namene kulu na bádha bhú 'bu inde. A ko kulu inde a ayo me ní mene e ngú naha sangu pi Ngámá gba ní ngae makpe. Abhomu-o, i tsia súno di pi okpála bádha bua gba ní-o. ²⁰ Otia inde ya apo bhúla e-e bhelé. Kaka-a, ya ngalilila ndjindji ngubula me okpála apá 'ngú na sisiti li ya tété de. ²¹ Ya ngagili ne kpéke me ya mene engú inde babadha bhú djila Ngámá gba ní di ne bhú djila ndu okpála hana.

²² Ya di ngatima saka ndai ní bini bhú dabili bini ne obhe bhisi bhomu. Ya ale ani bhatsibhatsi, ya atsia au me ani ngaha lie ndu 'kpí hana ngú kulu gba Ebhe-o. La mbia inde-e, ani matá ngaha lie ane mane anga ani ngambila ndjindji me yi ne kpúkpú na bua ni. ²³ La pi Tito-o, a ko kpála inde ya ngamene kulu ne e bhú dabili bini. Ya ngamene kulu ne ani bhú ká yi bhú dabili bini. Okpála bhe bhisi inde adhuku

† 8:15 8:15 Tsia bhú Eki. 16:18.

ne ani-e, okpála na oDadjua gba Ebhe-e atima uo ngao. U ngamene kulu ngú naha sangu pi Yesu Kilisito. ²⁴ Kaka-a, yi suno mukunda gba yi-e pi uo ne bua bini. Li okpála na oDadjua gba Ebhe-e aú lie mo-o, bhobhomu-o súno pi uo me ya pa 'ngú gba yi-e bhú djila uo bhú eu de.

9

Ebhe ne mukunda naali pi okpála inde ngaru 'he ne djali-o

¹ Tata ngú napa me ma ye 'ngú pi yi pindji kulu gba ní nateteke omabhuka inde bhú ndu doto na Yudaya ade. ² Padhá de, anga ma mbila bádha bua yi nde ne e pi uo hana. Ma ngapa 'li ma tété de ondaise ní na Makedonia* me, «ngayi ondaise ya na Akai, yi bedhe ngú nateteke omabhuka na Yudaya, nayie bha bini bhú kalanga inde akodho 'kpí-o.» Li okpála na Makedonia adje lie mo-o, okpála bhelé bhú ká uo asia di gumu nanu nateteke uo.

³ La-a, ma ngatima ondaise ní bata agba yi ngú napa me yi po bhúla tia bhomu-o kalanu maka ma apa nako pi okpála koko lie me yi améne mamene-o. Abhomu-o, nedhinga ya akólo lie agba yi-e, engú ya apa e pindji yi pi uo-o, akóto eu de. ⁴ Ne ma ne okpála na Makedonia, li ya kolo agba yi, ya bhaka me yi nde nga bedhe ade-e, numu méne ya naali. Ma ambila la bhadi me numu bhe gba yi-e dú la matá bhe nane mane,

* **9:2** 9:2 ODadjua gba Ebhe na Makedonia: A ko obhende bhú Filipoi, Tesalonike ne Belaya-o.

anga ma apa pi uo me yi bedhe. ⁵ Kaka-a, ma au ndjindji me ma yo ka ondaise ní inde-e me, u nu pi ya agba yi kalanu ngu napa me u holo napo bhúla tia inde yi apa nako me yi ahá e-o. Abhomu-o, tia bhomu-o adú bedhe ngu nadjেকে nakolo ka ma-o. A tsia súno me yi ngahaha ne bádha bua, yi ha ne siti bua de.

⁶ Yi mbila ndjindji me: kpála inde alu ezú bedi-e, ani asía bhadi bedi. Kpála inde alu ezú bhelé-e, asía bhadi bhelé! ⁷ Kaka-a, a ayo me kpála ne kpála ha maka ani abhundja lie-o. Ani apú ne bua na bhisi bhisi de, ani apú di de me anga u aholo ni tété ne kpéke-e de. Padhá de, anga Ebhe ne mukunda pi kpála inde ngapu 'he ne djali-o. ⁸ Yi mene mo-o, Ebhe ne angu ngu nabeledhe yi ne ndu bádha bhú 'bu hana, ngubula me yi du ndu 'kpi hana ne ndu 'he hana inde yi nde ne gumu e ngu mukobho gba yi-o. I du mo-o, yi du di ne 'he inde yi ti da na'o e li tula ndu obabadha kulu hana. ⁹ A maka u aye lie bhú Bhuku gba Ebhe-e li 'ngu gba kpála inde ngbingbili-e me:

«Kpála inde ngapu 'he pi obhulu ndibhili ne bua e bini-e,
bádha 'ngu gba ani-e ngadu duduma ne duduma.†»

¹⁰ Ebhe ngaha nguwa pi okpála ngu nalulu, di ne mapa ngu nazuzu. I nde lie mo-o, ani ahá ndu nguwa yi nde ne gumu e hana pi yi. Ani tsia méne di me a bhele ngubula me yi du napu 'he ne kalanu. ¹¹ Ebhe améne me yi du ndu nedhinga hana ne obhulu tia ngubula me yi du

† 9:9 9:9 Tsia bhú Ets. 112:9.

napu 'he ndu 'kpí hana. Abhomu-o, li okpála bhelé gíe heni pi Ebhe li ohe inde ya ahá e pi uo ne 'li yi-o. ¹² Padhá de, anga ehe yi apú e téteke bha bini omabhuka inde bhú ndibhili-e de. A méne di me okpála bhelé gie heni pi Ebhe bhú mayo gba o-o. ¹³ U aú kulu yi ngamene e ne tata naali. Kaka-a, u agíe heni pi Ebhe ngú nau me yi ngamanga Bádha Ngali gba Yesu Kilisito , di ne me yi ngagbo bhusu 'he gba yi-e ne o, di ne okpála koko. ¹⁴ U asúno mukunda gba o-o pi yi bhú nayo Ebhe. U améne mo-o, anga bádha bhú 'bu gba Ebhe-e amene me yi bhulu 'kpa yi pi uo. ¹⁵ A ayo me ndu okpála hana dhөгө Ebhe ngú bádha 'ngú gba e inde ane mane-o.

10

Polo agie 'ngú pi okpála inde nga'o 'ngú pí ani-o

¹ Ngama Polo-o, ma ngayo ka yi engú bini, ne 'li Yesu Kilisito kpála na bhuku 'ngú di ne bádha 'ngú-o. U ngapa li ma me ní du ne yi bhú dabili bini-e, ma ngakø lima ne kuto, i du la me ma nde tsutsu-o, ma ngagama okpekpeke 'ngú pi yi bhú obalua gba ma-o. ² Engú inde ma ngayo e ka yi-e, ma ngayo ka yi me, yi atíma ma de me ma gama okpekpeke 'ngú pi yi nedhinga ma akólo lie agba yi-e de. Okpála koko bhú ká yi ngabhundja me ya ngamene 'ngú maka okpála na doto. La-a, pi okpála bhomu-o, ma asúno angu gba ma-a pi uo masuno.

³ A na paká me ya ne okpála-kuti, engú bini, ya ngagu gbele maka okpála-kuti ade. ⁴ Bhú

gbele ya ngagu e-e, otia 'gú ya ngagu gbele ne e-e, a ko obhende na píla doto inde-e de. A ko okpekpeke tia 'gú inde ayie ka Ebhe. Otia 'gú bhomu-o ne angu ngú nabhili okpála inde ngagu Ebhe-o. Ya ngani ne di 'bhø obhulø eu inde ngagbe kpekebhe-o. ⁵ Ya ngaha angu eu gba uo inde ngamene me u abhúka Ebhe de-o. Ya ngagili nadjì mabhundja gba uo-o ngubula me u manga Yesu Kilisito. ⁶ Nedhinga yi apána lie me yi ngamanga ya maka a ayo lie-e, ya 'ó 'ngú pí ndu okpála koko hana inde i kunda namanga ya de-o.

⁷ Yi tsia 'ngú maka inde lie-o. Li okpála koko bhú ká yi pa me o ne okpála ka Yesu Kilisito-o, a ayo me u mbila me ya di ne okpála ka Yesu Kilisito maka uo. ⁸ Angu li Ngámá Yesu Kilisito aha e muma-a, a ngubula me ma teteke yi ne di. A ngubula nabhili yi ade. Nedhinga koko-o, ma ne gindaginda tété naali, ma dje numu tété de. ⁹ Ma kunda de me yi holo nabhundja me ma ngakunda nabu tsulø li yi, ne obalua gba ma, ma aye e pi yi-e de. ¹⁰ Padhá de, anga okpála bini bini ngapa me: «Li Polo ye balua pi ní-e, ani ngaye okpekpeke 'ngú, a ngandjia angu ní mandjia. Engú bini, ani kolo bhú ká ní ngae makpe-e, ani holo naguku, ani lé nagama 'ngú pima.» ¹¹ A ayo me okpála inde ngapa ngua 'ngú bhomu-o mbila me, engú inde ya ngaye e bhú obalua gba ya me ya nde de yi tsutsu-o, ya kolo gba yi-e, ya améne bha maka ya aye lie pi yi bhú obalua-o.

¹² Okpála bhomu-o ngau lio ne bhúlá naali. Ya

pá de me ya viti ne uo bini-e de, ya kpó 'ndji ya ne uo de. A ko ongingi. U ngapima lio ngao makpe, u ngakpo 'ndji o li kute o makpe. ¹³ Li pápá gba ya-a, ya ti da napa 'li ya nane dada mane de. Nedhinga li Ebhe amba bhúla ya lie ne kulu agba yi-e, ani atsia akodho kozie tété. Ya apise bha ne kulu gba ya li kozie ango-o. ¹⁴ Ya gó nani ne Bádha Ngali gba Yesu Kilisito agba yi de-e, u de apá li ya me ya agulu kozie gba ya-a agulu. Engú bini, i nde la lie me ya nde ne okpála na kalanu ngú nanu ne Bádha Ngali pi yi-e, bhobhomu-o asuno me ya gulu nga kozie gba ya-a de.

¹⁵ Kaka-a, ya pá 'li ya li kulu inde li okpála koko amene e de. Engú bini, ya ne gumu me nabhuka gba yi-e be ndu e, ngubula me kulu gba ya bhú ká yi-e be di ndu e. Ya abhundja me ya ne nga bili inde li Ebhe apa me ya pise lie de. ¹⁶ Pipita-a, ya ti da nasia kpadji ngú nanu ne Bádha Ngali-e bhú ondu doto koko. Ya kunda napa 'li ya li kulu li okpála koko amene e ngao li bili li Ebhe atima uo lie de.

¹⁷ Padhá de, anga Bhuku gba Ebhe-e apa me: «Li kpála kunda napa lie-e, a ayo me ani de pa bha bini li engú inde li Ebhe Ngámá amene e-o.†» ¹⁸ Padhá de, anga a ko de me Ebhe ngaziba okpála inde ngapa 'li o ngao makpe-e de. Engú bini, ani ngaziba obhende anga li ani-o.

11

† 10:17 10:17 Tsia bhú Djlm. 9:23; di ne bhú 1 Kol. 1:31.

Polo akpo 'ndji e ne okpála inde ngabhi 'kpa o pí mbulu o me o ne obhulu titima-o

¹ Yi ti da nadu ne 'ndjá bua muma uu, ngubula me ma gama mbo 'ngú maka bhulu pele! A moko, yi du ne 'ndjá bua muma. ² Padhá de, anga ma ne botolo ngú yi ndu nedhinga hana, maka li Ebhe nde di lie ne botolo ngú yi-o. Ma ngatsia 'kpí li yi ndjindji ngubula me yi du bubu ngú kava. Bhoko na kava angoo, a ko Yesu Kilisito . ³ Yi bhundja me kpulu apite nani Eva, ani atsia ayie li bádha kpadji. Kaka-a, ma ngakpe me kpála bini agó apite yi de ngubula me mukunda gba yi pi Yesu Kilisito ndjia.

⁴ Ma ngapa mo-o, anga li kpála bini go agba yi-e, yi bedhe ngú nabhuka ani má gala! Engú la li kpála angoo ngakpo e li 'ngú gba Yesu, ne li 'ngú gba Bu Bhobua , la di ne li 'ngú na Bádha Ngali-e kpi ne bhende ya asuno e pi yi-o. ⁵ Yi ngabhundja me okpála bhomu-o ne ongbengbe obhulu titima. La ngama-a, ma bhundja de me u ane ma-a de. ⁶ A na paká me pi yi-e, ma mbila nagama 'ngú bhú ká okpála ndjindji de. Engú bini, li pápá nambila Ebhe-e, ma mbila ani ndjindji. Ya asuno engú angoo pi yi mbánbá bhutsibhutsi bhú ndu 'ngú hana inde ya amene e-o.

⁷ Nedhinga ma akpokpo Bádha Ngali gba Ebhe lie pi yi-e, ma dha bhú yi de. Ma aké lima ne kuto ngubula me yi 'u ne bhúlá. Bhobhomu-o apa me ma amene sisiti? A mo-o ade. ⁸ Ma adu lie oo-o, ma aziba me oDadjua koko bi mukobho gba ma ngao. Ma abha otia na oDadjua angoo ngú nateteke yi nedi! ⁹ Oo-o, ma dha bhú kpála

bini bhú ká yi de, li ma adu lie ne gumu tia-o. Engú bini, omabhuka na Makedonia ago muma ne ehe inde ma adu ne gumu e ngao. Ma alila lima bhú ndu 'ngú hana me ma adú pi yi maka tili kili de. Ma ayó la di galikpe ehe li yi de.

¹⁰ Ne 'li Yesu Kilisito inde bhú ma-a, ma ngapa pi yi kukulu 'ngú: ma ne gindaginda naali anga ma nde ha 'he ka yi de. Bhú ndu doto gba yi na Akai libhomu-o, kpála bini ti da nayoko ma de me ma adú ne gindaginda tété de-e de. ¹¹ Ma kunda nadu tili kili pi yi de ka ni? A ko anga ma ne mukanda pi yi adi? Ebhe apá bhobhomu-o li ma ngae! ¹² Ma adú bha maka ma nde lie inde. Ma ziba tia ka yi de, ngabula me okpála bhe i ngabhi 'kpa o pí mbulu o me o ne obhulu titima aú kpadji ngú napa 'li o de me o bhadi ngamene kulu maka ya-a de. ¹³ Okpála ango-o, ngapite okpála. U ngamene 'he mugito me a ko obhulu titima gba Yesu Kilisito. ¹⁴ Engú ango-o ahá nangamba pi ní de, anga Satana ngae makpe ti bhadi da namene 'he mugito me a ko andjelu na zi 'kpí. ¹⁵ Kaka-a, li okpála na kulu gba ani-e mene 'he lio mugito me a ko kukulu okpála na kulu gba Ebhe inde ngbingbili-e, ní angamba tété de. Engú bini, li sokpi-e, u asía galikpe engú inde ati ne kulu inde u amene e-o.

Polo apa 'li e li olikabhu ani azu e-o

¹⁶ Ma matá ngapapa ne toto, kpála bini apá li ma de me ma ne bhulu pele-e de. I du me okpála nde abhundja me ma ne bhulu pele-e, yi de ziba me ma ne bhulu pele ngú napa me ngama di-e

ma pa mbo 'li ma bedi. ¹⁷ Engú ma adji apa inde-e, a ko de me ma adji napapa maka li Ngámá akunda lie de. Ma adji napa maka li bhulú pele agagama 'ngú lie-o. ¹⁸ Maka li okpála bhelé ngapa 'li o lie li ongú na doto-o, ngama di-e ma apá bhadi 'li ma tété moko. ¹⁹ Ngayi okpála na imbilangú-o, yi dje obhulú pele ngagama 'ngú-o, yi ngadje uo ne 'ndjá bua! ²⁰ Yi ngakibila me okpála bhomu-o mene yi mugito me yi ne obalise. Yi ngakibila me u zi ohe gba yi-o. Yi ngakibila me u pite yi. Yi ngakibila me u u yi padhá. Yi ngakibila me u sù bhúla yi. ²¹ Yi mbu li ya, anga ya adu nani bhúbhuku ngú namene mo-o! Ma ne numu naali ngú napapa!

Mbia inde-e, ma adji agáma 'ngú maka bhulú pele. Engú inde li okpála koko ngapa 'li o lie, ma apá nga bhadi 'li ma tété. ²² U ngapa me o ne omaYuda, ma di ne maYuda. U ngapa me o ne omafsalaele, ma di ne ma fsalaele. U ngapa me o ne odi Abalahama, ma di ne ye Abalahama. ²³ U ngapa me o ne okpála na kulu gba Yesu Kilisito. Mbia inde-e, ma agama 'ngú maka bhulú pele. Ma belegu ngamemene ane uo mane. Ma mene kulu ango-o ne ndala de. Ma ali bhú tikpu ane uo mane. Ma azu bhikpa ane uo mane. Ma akolo masikpe de nakpi bhutsibhutsi bhelé.

²⁴ Ma adu azu fimbo ndjikpa bata ne ká oduk-pabini, bhutsibhutsi bhuluvue sakpa ongámási gba omaYuda-o . ²⁵ Ongámási gba okpála na Loma abhi ma ne fimbo bhutsibhutsi bata, Okpála atutulú ma ne teme bhutsibhutsi bini ngú nabhelø ma. 'Ngbé zabu alinda ne ma bhú 'ngu

bhùtsibhùtsi bata. Ekpí bini, ma alipila bhú 'ngu, ma asi di bhúbhú.

²⁶ Bhú odhuku ma adu adhuku e naali-e, ma adu ne tsulu ka nasi ka engu. Ma adu ne tsulu ka obhulu nagbulu 'he gba okpála ne kpéke. Ma adu ne tsulu ka ondaise ma omaYuda, la di ka obhende ne omaYuda ade-o. Ma adu ne tsulu bhú gudhu, di ne bhú omili bili. Ma adu ne tsulu pí 'ngbé 'ngu. Ma adu ne tsulu ka okpála inde ngapa me o ne omakilisito, a nde la mo-o ade-o. ²⁷ Ma amene kulu kpekpeke. Ma asi ndi 'la bhùtsibhùtsi. Ma adje gumu bhú dabili bini ne gumu 'ngu. Bhùtsibhùtsi bhelé, ma sia kpadji nazu 'he de. Bongo du ka ma bhelé de, ma atsia adu adje zini. ²⁸ Olikabhu ma azu e bhelé, ma ti da nakpokpokpo hana de. Engú bini, engú inde li bua ma ngalu pí e, a ko nabhundja oDadjua gba Ebhe-e ndu 'kpí hana. ²⁹ Li kpála bini du bhùbhuku li kpadji gba Yesu-o, a ngamene ma sisiti magito me a ko ma. Li kpála bini ti bhú siti 'ngú-o, a ngamene bua ma sisiti naali.

³⁰ I du me a nde a ayo me ma pa 'li ma-a, ma apá bha bini li ongu inde ngasuno me ma bhùbhuku-o. ³¹ A ayo me okpála dhogò Ebhe inde 'Dyi Ngámá Yesu-o duduma ne duduma. Ani mbila hana me engú inde ma adji apa e pi yi inde-e, a ko eu de. ³² Yi tsia nga engú inde ngasuno me ma bhùbhuku-o. Ekpí bini, nedhinga ma adu lie bhú gudhu na Damasi-e, ngámá na kuti bhomu-o, adu 'li ani me Alitasi. A adu ka ani ne guvelenele bini inde adu atsia 'kpí li gudhu bhomu-o. Ani a'o nani okpála gba

e li okpadji nali bhú gúdhú bhomu-o ngú napa me u u ma-a, u de holo ma. ³³ Engú bini, okpála gba Ebhe-e ato ma bhú бага, u agbite ekpú tété, u atsia akə ma ne di li malilisa na aga asa kuti libhому-o. Ma atsia akobho sakpa ani.†

12

Polo apa 'li e pindji angu inde li Ebhe ngaha e pi ani bhú bhuku gba e-o

¹ A ayo me ma pa matá 'li ma ne kalanu, abana li tata nde lie tété ade-o. Kaka-a, ma adjì nagama 'ngú pindji ongu li Ngámá Yesu asuno e muma, ani atsia ambamba di ta e muma-o. ² Ma ambila kpála bini* inde agbite lie li Yesu Kilisito . A ane nga kalanga ndjikpa ne ká badha, Ebhe a'e kpála bhomu-o abhúlá agba e, ani atsia agie ani kuto ei. Ma mbila de ne me ani aloto nani maloto, ne me Ebhe a'e ani abhúlá na paká. Ebhe ambila bha ngae, ma mbila naama de. ³ Ma apá matá ne toto, ne me ani aloto maloto, ne me Ebhe a'e ani abhúlá na paká. Ma mbila de, Ebhe ambila bha ngae.

⁴ Ebhe a'e kpála bhomu-o abhú kuti na mundayi . Oo, ani atsia adje ongu inde li kpálakuti ti da nakpokpo kú e de. ⁵ Ma ti da napa 'li ma li 'ngú akolo li kpála bhomu-o. Engú bini, pindji ongu bhe atsia ma makpe-e, ma ti da napa 'li ma bha bini li engú inde ngasuno me engú bhú ma ade. ⁶ La-a, i dú me ma kúnda napa 'li ma u-o,

† **11:33** 11:32-33 Tsia bhú Kul. 9:23-25. * **12:2** 12:2 Ngú nambila kpála inde li Polo ngakpo 'ngú gba e si-e, tsia lukuluku 7.

ma de dú ne bhulu pele de. Padhá de, anga ma de apá kukulu 'ngú. Engú bini, ma kunda napa 'li ma de, anga ma kunda de me okpála u ma mugito me ma ne 'ngbé kpála-a de. Ma akunda mangbo me okpála manga ma ka ongú inde u ngadje ma me ma ngapa e ko.

⁷ A ayo nako me 'ndji ma be naali ka ongú na ngangamba inde li Ebhe ambamba ta e muma-o. La-a, ngú napa me 'ndji ma abé naali de-e, Ebhe a'o ehe bini na ke make li kute ma. Ehe ango-o maka bhulu titima gba Satana . A ngabhi ma, a di ngayoko ma me ma abédhe ne 'ngbé 'ndji bedhe de. ⁸ Ma ayo ka Ngámá bhatsibhatsi bata me ani gbegbe ma bhú likabhu bhomu-o. ⁹ Ani agie muma me: «Ma ngaha bádha bhú 'bu gba ma-a pi ma ngabula me a teteke ma ngú nakibila likabhu bhomu-o. Padhá de, anga nedhinga li kpála nde lie bhabhuku-o, a bhomu-o nedhinga inde li angu gba ma-a ngamene kulu lie bhú kpála bhomu libhому-o.» I nde lie mo-o, ma akunda mangbo me ma pa 'li ma li ongú inde ngasuno me ma bhabhuku-o, ngabula me angu gba Yesu Kilisito mene kulu bhú ma.

¹⁰ Kaka-a, ma tété ne djali li nedhinga ma nde lie bhabhuku-o. Abana li okpála sobho ma, abana ma zu likabhu, abana u to mbolo li ma, abana ma kibila olikabhu bhomu-o hana kabula 'li Yesu Kilisito-o, ma tété ne djali, anga nedhinga li angu nde lie bhú ma ade-e, a bhomu-o nedhinga ma nde lie kpekpeke-o.

Polo alopole lie li 'ngú gba omabhuka na gudu na Kolito

11 Ma agama 'ngú bhomu-o mụgito me ma ne bhulu pele. La-a, yi akata ma tété ngayi. A ayo me yi kpo 'ngú gba ma-a ngayi. Padhá de, anga abana ma du ne kpála na padhá-a, me obhende yi nga'i o me a ko ongbengbe obhulu titima bhomu-o, u ne ma ne 'ngbé de. 12 Okulu inde-e ngasuno me ma ne bhulu titima, ma amene bhú ká yi ne 'ndjá bua. Ongú ango-o, a ko ongamba 'ngú inde li Ebhe amene e-o. 13 Ongú bhende ma amene e pi obi yi omabhuka na Dadjua koko me ma nde mene agba yi de-e ngae dho? Belegu de bini! Ehe inde ma mene e agba yi de-e, a ko bha bini ma dha lie bhú yi de-o. Yi suno bádha bhú 'bu muma li siti 'ngú ma amene e li yi bhomu-o!

14 Mbía inde-e, ma ngakunda nanu agba yi bhutsibhutsi na bata. Abana ma nu agba yi bhú dhuku inde-e, ma dhá bhú yi de. Ma ngakpata mangbo yi, ma kpata tia gba yi-e de. Yi mbila ndjindji me a ayo de me ongisi po tia pi okpála azu o de. A ayo mangbo me odyi ongisi, ne ohi ongisi po tia pi ongisi gba o-o. 15 Li pápá gba ma-a, abana ma pu ndu 'he inde ka ma-a hana ngubula yi, abana ma pu mukobho gba ma-a ngubula yi-e, ma dú bha tété bhú djali. Ma suno mukunda pi yi naali mo-o, yi tsia suno mukunda muma bedi?

16 Ndu yi hana yi mbila ndjindji me ma dha nako bhú kpála bini bhú ká yi de. Engú bini, okpála koko bhú ká yi ngapa me: «Polo ne bhulu kali! Ani abha tia gba ní-e bhú nyali.» 17 Ma apite yi lele pi? Ma azi yi li kpadji gba suka okpála ma atima o agba yi-e? 18 Ma ayo ka Tito ne kekele

me ani nũ agba yi. Ma atima di bhú dabili bini ne ani ndai ní inde yi mbila e ndjindji-o. Tito akolo lie agba yi-e, ani aha 'he li yi bhú kali? A mo-o ade! Ehe inde li Tito amene e ne bhende ma amene e-e, aviti bha bini, bua ya ne ani bhú dabili bini.

¹⁹ Nedhinga koko, nayie nani bhutode yi ngab-hundja me ya ngagili nabubuku nganda ya bhú djila yi. A mo-o ade! Ya mangbo ngakpokpo 'ngú inde-e kala Ebhe maka li Yesu Kilisito akunda lie-o. Ondaise ya, ya apa ndũ ongú bhomu-o hana pi yi, anga ya akunda nateteke yi me yi bhele li kpadji gba Yesu Kilisito-o. ²⁰ Ma ngakpe me nedhinga koko, li ma akólo lie agba yi-e, ma bhaka me yi ngakobho maka ma akunda lie de. Ma ngakpe di me lele dasundũ gba ma-a ngá li yi de. Ma ngakpe me nedhinga ma akólo lie agba yi-e, yi dũ nagbe bhayiki sũnda yi, yi dũ nadjegumũ 'he liyi sũnda yi, yi dũ nake 'ngú liyi sisiti, yi dũ nagbo bhũsũ yi, yi dũ nasobho li yi sũnda yi, yi dũ napadha liyi sũnda yi, yi dũ nadjekute yi, yi tsia dũ la di namene engú ngangá.

²¹ Ma ngakpe me nedhinga ma agó lie agba yi bhe na sidi-e, Ebhe gba ní-e ha nũmũ mũma bhú djila yi. Ma ngakpe me ma ku 'gbá ka okpála bhelé inde ngamene siti 'ngú ne kalanũ maka nako u adũ namemene lie kalanũ-o. Okpála ango-o, u dji nga bua o ne toto li namene siti 'ngú de, u ngakunda olisi, i dũ di-e obhosi ngangá, u ngamene ndũ sisiti 'ngú hana.

Polo agbele 'dje omabhuka na gɔdhu na Kolito ne toto

¹ A inde-e bhɔtsibhɔtsi na bata me ma go agba yi. A maka u aye lie bhú Bhuku gba Ebhe-e me: «Li kpála pa 'ngú li kilí e, a ayo mbo me okpála bhisi, i ɗu di-e okpála bata de lu pí 'ngú angoo. I ɗu mo-o de, u kóɗho 'ngú tété de.†» ² Nako ma ago lie agba yi bhɔtsibhɔtsi na bhisi-e, ma agbele 'dje okpála inde adu namene siti 'ngú-o bhú dabili bini ne okpála koko hana. Mbia inde-e, ma nde lie tsutsu-o, ma matá ngagbele 'dje uo ne toto me nedhinga ma agó matá lie agba yi-e, ma djé ndjinga kpála bini bhú ká uo de.

³ Yi ngagili me yi u ehe inde ngasuno me Yesu Kilisito ngagama 'ngú bhú ma ngae-o. Ma asúno pi yi masuno. Yesu Kilisito bhú ká yi bhɔbhuku ade. Engú bini, ani ngasuno angu gba e bhú ká yi. ⁴ A na paká me nedhinga u abhi ani ne nyeli lie li kulusi-e, angu ɗu bhú ani de. Engú bini, mbia inde-e, ani bhú mukobho ka angu gba Ebhe. Maka ya akpɔtsɔ liya lie ne ani-e, ngaya di-e, ya bhɔbhuku maka ani adu nani lie-o. Engú bini, ya akpɔtsɔ liya lie ne ani bhú mukobho gba e-e, lele nalili okpála ka ya bhú ka yi adú bhadi ne angu gba ani-o.

⁵ Yi tsia bua yi ngayi makpe ngú nambila me yi ngakobho maka omabhuka na paká. Yi mbila ndjindji me Yesu Kilisito bhú ka yi. A mo-o adi? I ɗu mo-o de-e, u ú ehe inde ngasuno me yi abhuka

† **13:1** 13:1 Tsia bhú Det. 19:15; ne bhú Mat. 18:16; ne bhú 1 Tim. 5:19; ne bhú Ebe. 10:28; di ne bhú 2 Kol. 12:14.

de. La-a, a ko likabhu i dɔ me ani nde bhú yi ade-o. ⁶ Engú bini, ma abhundja me yi mbila ndjindji me, pi ya-a, okpála ti da nau ehe inde asuno me ya ne kúkúlu obhúlu titima gba Yesu Kilisito.

⁷ Ya ngayo Ebhe me yi améne siti 'ngú bini de ne nayala me ya li yi. A ko de me ya ngakúnda bhomu-o nasuno me angu ya akolo de. Engú bini, ya ngakúnda mangbo me ya dɔ nau yi namene bádha 'ngú, abana i dɔ me a nde ngau lie me angu ya kolo de-o. ⁸ Padhá de, anga ya ti da nagú yi de, i dɔ me yi nde ngakpata nasuno na kúkúlu gba Ebhe-o. I dɔ me yi nde amene mo-o, a ayo mangbo me ya teteke yi ngú nanɔ ne kalanɔ. ⁹ Ya ngakpi djali ndɔ 'kpí hana nedhinga li ngaya-a, ya nde lie mandi angu, me a nde la bhú yi ne angu-o. Kaka-a, ya ngayo di bhú omayo gba ya-a me yi kolo ngbingbili ne ndɔ kpadji hana. ¹⁰ Ka 'ngú ango-o, ma ngaye ndɔ 'ngú bhomu-o hana pi yi nedhinga ma nde lie bhú ká yi ade-o. A ko ngubula me nedhinga ma akólo lie bhú ká yi-e, ma améne yi kpekpeke de ne angu li Ngámá Yesu aha e mɔma-o. Angu ango-o ngateteke yi me Dadjua gba yi-e be ndɔ e ne kalanɔ, a ngubula nabhɔbhɔlɔ mabhɔlɔ ade.

¹¹ Ngú nabu tata-a, ondaise ma, yi bedhe ne djali bedhe. Yi mene kulu ngú napa me yi dɔ ngbingbili ne ndɔ kpadji hana, yi to masi bhú yi sɔnda yi, yi dɔ bhú nadjɛ liyi sɔnda yi, yi dɔ ne guo 'ngú sɔnda yi. Yi mene mo-o, Ebhe inde ne Ebhe na mukúnda di ne guo 'ngú-o tsia dú ne yi bhú dabili bini. ¹² Yi yi liyi sɔnda yi ne nakama liyi maka ondaise. Ndɔ ondaise ní inde ei-e hana

apa me o yi yi ma yi. ¹³ A ayo me bádha bhú 'bu gba Ngámá Yesu Kilisito, ne mukúnda gba Ebhe, la di ne nakpetse lio gba Bu Bhobua-a da bhú dabilí bini ne ndu yi hana.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

6b4904fb-f8ce-5931-8218-7cee8914232c